

太上三生解冤妙經

爾時

尋聲救苦天尊與諸侍從巡遊十方世界。化度眾生出離苦海。令歸正道不入邪宗。觀見西方於內一國王號淨梵。此國人民多生淫殺。不造善功。多沉地獄。多失人身。念彼眾生。遂即化身下降。其國王夜夢神報來曰。天尊自東而至。何不迎之。王心不寐。坐而待旦。詔眾大臣后妃天親。及諸市民遠離本所。迎接天尊。至於城西。有一大園。樓閣嚴整。

花大繁盛。是時天尊在七寶殿內。金龍座上。天童侍衛。國王大臣后妃天親及諸市民座下。圍繞觀聽演說正一妙法。俄然瑞氣盈園。天花交散。大眾驚異喜悅難言。時有皇后及諸貴妃燒香拜禮。跪而告曰。弊居小國。愚魯之邦。未嘗得聞如斯高玄妙道。今日遇值。深為幸矣。有少短意欲訴道前。伏願洪慈特賜允許。

天尊曰。汝有何言。盡心而說。皇后告曰。今王年老。子嗣未立。先有所懷。數月之中。遂致損落。其或月滿所得。男女或一歲二歲或三歲。或五歲之間。即便死亡。未知前生今世何罪。致得如是。若蒙哀愍。則仰受訣言。

天尊曰。是汝前生之中。懷孕不慎。殺落其胎。兒女心內憎嫌。故得今身如此之報。恐汝不信。吾今攝此冤魂。汝當親問。天尊指處皇后視之。見一夜叉面如葉。藍眼如怪星。指皇后

而言。前生之時。我受陰注。投你為母。你身
年幼。全無惜護。隨性作為。因此不慎殺落我
身。今欲還報。緣汝前世生居中國。敬奉天地。
日月星辰。勤侍翁婆。孝順父母。欽崇三寶。
至重善人。塑像造經。略無慳惜。蓋殿修壇。竭
力施為。憫憐困苦。濟惠貧寒。積此善功。今生
證為小國之后。若非此福。我即殺你。料應多
日。皇后聞言。心神懼怕。戰戰兢兢。拜跪道前。
我有先身。曾作如是。今日雖知。悔之何及。伏

望天尊略示方便。捨自己之財。盡為布施。願
求解釋。

天尊曰。善哉善哉。汝雖前生建大功德。廣作
福田。即知不曾懺悔身中之冤結。吾^帝昔於正

一天尊。受《三生解冤妙經》。汝當隨 吾^帝
精心誦之。冤業自消。夫人稟天地而生。構陰
陽而成。三月之外。始分男女。可保而不可傷。
可養而不可害。命與大人一體。無異誤損有

落便成冤債。一日造冤。三世報還豈不怖哉。
迷昧眾生。倚恃年壯。懷孕之時。全無將護。
恣意而行。登高跳下。負重急走。或跨騎勞形。
或陰陽不慎。或撞或隱。或搦^力或按。或撲或
揉。或服藥而損。或針刺而傷。或食毒魚惡肉。
或喫^吃硬物冷漿。如斯等事。妊孕多傷。或是
自作。或教他殺害之。因焉能盡說前生所作。
今身還報。致使懷孕多病。疼痛纏綿。飲食減

少。行立艱難。皮膚腫破。腰似錐鑽。巴明盼盼夜。一日如年。受此痛苦。嗟至月足臨產。多般或連日不分。或橫逆不順。親姻恐懼。眷屬憂惶。當此之時。冤家來害。苦痛非常。或母活子死。或子活母死。或子母俱亡。皆為橫夭之魂。若得託生。依前再受。若未託生。纏害親姻。若遇此經。志心持念。一切冤業盡總消除。即說咒曰。

晨昏運度 耀明古今 萬類受稟 結化成形
冤孽誤染 三世相侵 正一之氣 解免冤魂
聞之即散 聽之離分 天丁甲卒 扶護無傾
速生速免 各得安寧 元皇符命 時刻不停
急急如律令

是時念經七徧夜叉座前拜謝。

天尊我今承斯功德。徑往中土託生富貴之家。拜謝而去。眾人聞之皆大歡喜。

天尊曰。此經非獨解一人之冤結。汝等各發誠心。誦經百遍。一國之人應有冤結。悉皆解脫。于會下言同聲誦之。至於百遍。驀見陰雲四布。黑霧之中。瑞氣垂空。諸多類拜而言。我等特蒙。

天慈降賜經法。一國冤結。已^以生未生。罪無輕重咸皆解脫。倏^叔忽之間。雲收霧斂。天氣朗清。人民歡慶。讚謝天恩。眾等告曰。然賴

道力。普得濟度。雖無即目之冤。慮有他時所犯。作何預修功德。永離此苦。

天尊曰。吾^帝今說此《三生解冤妙經》。若有善男子善女人。每日燒香誦經三遍。己身冤結盡皆消滅。如精心抄一本與人。合家眷屬同霑福惠。若復有人胎氣怯弱。或數落不安。轉禮此經。即得安穩。必得智慧男女。如睡夢中間常見亡過兒女。此是冤業又待重來。精

心每日旦暮燒香拜禮此經。冤魂自退。普無驚怖。若復有人臨產多難。即於難月之前。請正一道士法師。對三清聖像焚香誦經。遂感善神護佑。誕育順理。則無冤橫之災。子母全安。各保天年之壽。如行住坐臥。精誠持念。後世為人。富貴聰明。形容端正。子孫榮旺。獲福無量。歎斯因緣而作偈曰。

眾生多結冤 冤深難解結
一日結成冤 三世報不歇
我今傳妙經 解除諸冤孽
聞誦志心聽 冤家自消滅

是時天尊說經既畢。諸仙大聖來迎。

天尊巡遊他方。濟拔群品。再為國王后妃曰。
自後依奉正道。即生孝慧之男。